

Un rat'i ora cu Tanta Dora

Tempo di Plantamento 4



Com bai muchanan? Com boso a pasa e dianan di fiesta? Un bon aña pa bosonan cu hopi felicidad y hopi exito cu boso estudio, ya cu fin di aña escolar ta djis aki. Boso a gosa hopi cu Dande? Bo sa cu ora di canta Dande, e jiu mayor y esun di mas chikito ta wordu cantá cu palabranan special manera: "Pret'i wow'i su papachi, perla fin'i su mamachi..."

Awor cu fiesta di Pasco y Aña Nobo a pasa, laga nos ban wak com a para cu nos mainshi rabo cu ta wardá den magasin.

Nos ta jena e maishi na saco y ta poné **solia** henter dia, esey kier meen poné den solo pa e bira bon cayente. Ya ora ta bati e mainshi, e pipitanan ta sali mas liher. Ta pone e saco rina **plenchi**, esey ta un vloer chikito, trahá di cement masha fini mes. E palo di bati mainshi mester ta **korkobiá**, no recht pero cu un boog. Nos ta jamé **muele** y e ta trahá di un bara diki di palo di kawara di

mondi, pasobra esey ta un palo hopi liher. Tin cu hisa e palo halto pasa bo cabez y ta dal e cu forza riba e saco. Bolter e saco pa e otro banda y sigi batié. Ora e ta bon batí, ta habri e saco, saca e tapushinan bashí cu nos ta jama **bagas**. Ta basha e pipitanan for di den e saco den punchera y ta bai **bienté**. Bienta kier meen, basha for di esun punchera den e otro, pero mester tene esun punchera poco halto for di otro pa e biento por pasa hiba tur e stof. Nos ta bienté den **sabana**, esey ta un curá grandi sin mata unda tin hopi biento. E biento ta hiba tur e stof y claro cu algun pipita ta cai abao, pero esey no ta problema, djis ta bin un cama di totolica of buladuifi bin come. Ora nan ta bin na cantidad, nos ta bisa **cama di parha**, na hulandes (een vlucht duiven). Si ta di pisca nos ta bisa un **mancha di pisca** (een school vissen).

Awor nos ta bai **djadja** e maishi. Nos ta corta un calbas grandi, rondó na dos oea e ta berde y moli. Ora e seca e ta bira duro, esey nos ta usa pa djadja e mainshi. Nos ta tené den nos man y ta drey e rond. Asina tur e **dakoko** ta hala un banda. Dakoko ta e flishi preto cu e maishi ta den. Door di djadjé, tur e flishi ta kita. Ta laba e maishi y ta poné seca riba un serbette limpi riba e plenchi den sabana. Mester cuidé si, pasobra tin hopi caiman na boca di riu, esey kier meen hopi enemigo manera totolica, buladuifi, moffi, trupial, chonchorogai. patrishí. Tur ta parhanan cu ta bin come y no lubida e lagadishi y e cododonan. Ta fiesta pa nan!

Muchanan, otro biaha nos ta sigi com ta haña hariña di maishi rabo y com ta bati pan. Haci boso best na scol, aunque djis aki ta Carnaval. Te otro biaha.....

Tanta Dora.





CHABALITO

Number 5 - Año 2 - January, 2000 - Afl. 2,=

